



PREZIDÉNSIA
KONSELLU
MINISTRUS
VIII GOVERNUN KONSTITUSIONÁL



Gabinete
Porta-Voz

KOMUNIKADU IMPRENSA

Sorumutuk Konsellu Ministrus nian iha loron 8 fulan-jullu tinan 2020

Konsellu Ministrus hala'o sorumutuk iha Palásiu Governu, iha Dili, no aprova ona projetu Rezolusaun Governu nian, ne'ebé Primeiru-Ministru, Taur Matan Ruak mak apresenta, kona-ba konklusaun ba konstrusaun ró "Haksolok", ne'ebé atu tula naha no pasajeiru sira. Projetu atu sosa Ferry Ro-Ro, aleinde nia natureza nasional no interese públiku hodi hadi'a no hasa'e rede komunikaun nasional, liuhosi hadi'a ligasaun iha kosta norte nasaun nian no, kria ligasaun ho illa sira indonézia nian ne'ebé besik, ninia objetivu prinsipál maka hamenus uitoan tan rejiaun Oé-Cusse Ambeno nia izolamentu. Tuir Rezolusaun ne'e, estabelese katak Rejiaun Administrativa Espesial Oé-Cusse Ambeno (RAEOA) nu'udar ema koletiva pública ne'ebé responsável hodi lori prosesu negosiál no hodi halo diliénsia ne'ebé prezisa atu remata konstrusaun ba ró "Haksolok". Órgaun sira hosi RAEOA maka kaer mós responsabilidade tomak atu pratika atu sira ne'ebé relasiona ho jestaun ba kontratu ne'ebé celebra ona ho *Atlanticeagle Shipbuilding* ne'ebé halo konstrusaun ba ró "Haksolok", ne'ebé tula naha no pasajeiru sira.

Konsellu Ministrus aprova mós projetu Deliberaun, ne'ebé ninia objetivu mak atu aprova ezonerasaun husi Francisco da Costa Monteiro ba kargu Prezidente Konsellu Administrasaun Timor Gap – Timor Gás & Petróleu, E.P no, hamutuk, ba kargu Prezidente Diresaun Ezekutiva nian, no atu aprova nomeasaun husi António José Loiola de Sousa ba kargu sira ne'e.

Prezidente Komisaun ba Elaborasaun Planu Rekuperasaun Ekonómika, Rui Augusto Gomes, halo tiha apresentasaun ida ba Konsellu Ministrus kona-ba rekomendasaun lubun



Palácio do Governo,
Avenida Presidente Nicolau Lobato,
Dili, Timor-Leste



PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete
Porta-Voz

ida ba medida sira kurtu prazu nian, iha faze dahuluk mitigasaun husi impaktu krize KOVID-19. Durante nia apresentasaun, Prezidente Komisaun apresenta ona dadus kona-ba konjuntura internasionál, iha ne'ebé KOVID-19 afeta hela área ruma, iha nível mundiál, liuliu rendimentu sira, ho kontratasau boot liu ba atividade ekonómika dezde Depresaun Boot iha tinan 1929, saúde, hodi halo ema rihun ba rihun maka mate ona, direta no indiretamente husi KOVID-19, no edukasaun, ho eskola barak tebes maka taka ona no redusaun efetiva ba número labarik sira ne'ebé asesu ba eskola.

Apresentasaun ne'e foka mós ba kontestu Timor-Leste nian, diagnóstiku ba situasaun ekonómiku-sosiál iha país ne'e molok KOVID-19 no impaktu husi koronavirus foun iha Timor-Leste. Maske medida hirak ne'ebé Governu adopta ona durante vijénsia Estadu Emerjénsia nian kontribui ona atu asegura postu servisu no apoia empreza, no mós atu mantein nível konsumu traballadór no família nian sira, prevee nafatin nesesidade atu mantein ka kria medida foun sira molok 2020 nia rohan, hodi apoia ba nesesidade bázika sidadaun sira nian, apoia traballadór sira iha setór informál, mantein postu traballu no rendimentu, no mantein empreza sira iha merkadu. Governu sei kontinua atu halo análize ba rekomendasaun sira Komisaun ne'e nian, ho objetivu atu deside medida kurtu prazu hirak ne'ebé maka sei implementa iha 2020, hodi haree ba mitigasaun ba impaktu husi krize KOVID-19 nian.

Ikusliu, Konsellu Ministrus aprova ona projetu Deliberasaun, ne'ebé apresenta husi Ministru Finansas, Fernando Hanjam, kona-ba tetu finál ba dotasaun orsamentál temporária ba fulan- jullu tinan 2020, iha ne'ebé fiksa ona valór dólar amerikanu millaun USD\$ 120.7 (inklui pagamentu ba empréstimu sira). **Remata**



Palácio do Governo,
Avenida Presidente Nicolau Lobato,
Dili, Timor-Leste